

Na osnovu čl. 4.2, 4.7. i 7. Zakona o prijenosu, regulatoru i operatoru sistema električne energije u Bosni i Hercegovini ("Službeni glasnik BiH", broj 7/02, 13/03, 76/09 i 1/11), člana 36. Poslovnika o radu Državne regulatorne komisije za električnu energiju ("Službeni glasnik BiH", broj 2/05) i člana 16. Pravilnika o licencama – Prečišćeni tekst ("Službeni glasnik BiH", broj 63/16), rješavajući po zahtjevu Javnog preduzeća za komunalne djelatnosti "Komunalno Brčko" d.o.o., Brčko Distrikt BiH, broj 05-28-12-177-1/22 od 27. juna 2022. godine, na sjednici Državne regulatorne komisije za električnu energiju, održanoj 28. septembra 2022. godine, donijeta je

ODLUKA

O IZDAVANJU LICENCE ZA DJELATNOST TRGOVINE I SNABDIJEVANJA ELEKTRIČNOM ENERGIJOM NA TERITORIJI BOSNE I HERCEGOVINE

1. Javnom preduzeću za komunalne djelatnosti "Komunalno Brčko" d.o.o., Brčko Distrikt BiH, izdaje se licenca za obavljanje djelatnosti trgovine i snabdijevanja električnom energijom na teritoriji Bosne i Hercegovine.
2. Licenca iz tačke 1. ove Odluke izdaje se za period od 1. novembra 2022. godine do 31. oktobra 2027. godine i koristi se u skladu sa Uvjetima za korištenje licence za obavljanje djelatnosti trgovine i snabdijevanja električnom energijom na teritoriji Bosne i Hercegovine.
3. Licenca i Uvjeti za korištenje licence za obavljanje djelatnosti trgovine i snabdijevanja električnom energijom na teritoriji Bosne i Hercegovine sastavni su dijelovi ove Odluke.
4. Vlasnik licence je u obavezi plaćati regulatornu naknadu u periodu važenja licence, na način i u rokovima utvrđenim posebnim aktom.
5. Ova Odluka stupa na snagu danom donošenja, a njen dispozitiv bit će objavljen u "Službenom glasniku BiH", službenim glasilima entiteta i Brčko Distrikta Bosne i Hercegovine.

Obrazloženje

Javno preduzeće za komunalne djelatnosti "Komunalno Brčko" d.o.o., Brčko Distrikt BiH (u daljnjem tekstu: podnosilac zahtjeva), koje je, shodno Odluci o osnivanju javnog preduzeća "Komunalno Brčko" d.o.o., Brčko Distrikt BiH ("Službeni glasnik Brčko Distrikta BiH", br. 20/07, 21/07, 24/08 i 33/09), dužno omogućiti distribuciju električne energije, te vršiti snabdijevanje korisnika sistema i kupaca električnom energijom na svom području djelovanja, vlasnik je licence za obavljanje djelatnosti trgovine i snabdijevanja električnom energijom na teritoriji Bosne i Hercegovine, upisane u Registar licenci kod Državne regulatorne komisije za električnu energiju (u daljnjem tekstu: DERK) pod registracijskim brojem 05-28-12-223-16/17 od 11. oktobra 2017. godine, čije trajanje istječe 31. oktobra 2022. godine.

Saglasno pravu da koristi mogućnost obnove licence i ispunjavajući obavezu iz člana 48. Pravilnika o licencama – Prečišćeni tekst ("Službeni glasnik BiH", broj 63/16) da, prije isteka važnosti posjedujuće licence, izrazi svoju namjeru da djelatnost trgovine i snabdijevanja električnom energijom na teritoriji Bosne i Hercegovine nastavi i dalje obavljati, vlasnik licence je podnio zahtjev za izdavanje nove licence koji je zaprimljen pod brojem 05-28-12-177-1/22 od 27. juna 2022. godine. O podnijetom zahtjevu odlučuje se u skladu sa internim pravilima i propisima DERK-a i shodno članu 7. Zakona o prijenosu, regulatoru i operatoru sistema električne energije u Bosni i Hercegovini.

Zahtjev je podniet na propisanim obrascima, sa dokazom o prethodno izvršenoj uplati naknade za rješavanje zahtjeva i relevantnim dokumentima koji su, podnieti uz zahtjev ili predočeni naknadno, omogućili DERK-u da razumije, razmatra i odlučuje o podnietom zahtjevu o čemu je DERK obavijestio podnosioca zahtjeva svojim aktom broj 05-28-12-177-5/22 od 27. jula 2022. godine.

Po pregledu i provjeri svih formalnih elemenata zahtjeva DERK je najprije 29. jula 2022. godine objavio u dnevnim novinama i na svojoj internet stranici kratku obavijest za javnost sumirajući zahtjev za licencu i odredio rok do 5. augusta 2022. godine za dostavljanje komentara javnosti na podnieti zahtjev za izdavanje licence.

DERK konstatira da nisu dostavljani komentari javnosti u vezi podnietog zahtjeva za dodjelu licence, niti je na javni poziv DERK-a bilo koje lice kandidiralo svoj interes da učestvuje u postupku u svojstvu umješaka.

Podnosilac zahtjeva nesporno ispunjava sve kriterije, uvjete i standarde propisane zakonom i pravilima i propisima DERK-a da obavlja djelatnost trgovine i snabdijevanja električnom energijom na teritoriji Bosne i Hercegovine jer su njegove tehničke, pravne i finansijske mogućnosti permanentno potvrđivane prethodnih godina korištenja licence, u toku kojih je o tome pružao valjane dokaze.

Nadzor svih aspekata usklađenosti dosadašnjeg djelovanja podnosioca zahtjeva sa uvjetima i kriterijima za obavljanje djelatnosti trgovine i snabdijevanja električnom energijom na teritoriji Bosne i Hercegovine dao je osnova DERK-u da pristupi obnovi licence, odnosno pripremi početne verzije Uvjeta za korištenje licence koja bi, takođe, važila pet godina. Ovaj dokument je od 1. septembra 2022. godine učinjen dostupnim podnosiocu zahtjeva, kao i svim drugim zainteresiranim članovima javnosti, a omogućena im je prilika da iznesu svoje komentare i na općoj javnoj raspravi obavljenoj 7. septembra 2022. godine u sjedištu DERK-a u Tuzli, uz prethodnu objavu odgovarajuće obavijesti u dnevnim novinama i objavu dokumenta na internet stranici DERK-a.

S obzirom da su na održanoj općoj raspravi izostali bilo čiji komentari koji su mogli utjecati da neki od uvjeta za korištenje licence budu uređeni na drugačiji način, pripremljen je prijedlog da se zatražena licenca izda i dostavljen podnosiocu zahtjeva aktom DERK-a broj 05-28-12-177-16/22 od 15. septembra 2022. godine. Po dostavljanju Prijedloga odluke, podnosilac zahtjeva nije imao komentara, pa je bilo osnovano zaključiti da se prijedlog DERK-a smatra sačinjenim u skladu sa Zakonom o prijenosu, regulatoru i operatoru sistema električne enegije u BiH i podzakonskim propisima koji reguliraju predmetnu materiju.

U skladu sa članom 9.2 Zakona o prijenosu, regulatoru i operatoru sistema električne energije u BiH, protiv ove Odluke može se pokrenuti postupak pred Sudom Bosne i Hercegovine podnošenjem tužbe u roku od 60 dana od dana prijema.

Broj: 05-28-12-177-18/22
28. septembar 2022. godine

Tuzla

Predsjedavajući Komisije

Suad Zeljković